

無罪者不傷。又令沒水，直者入即不沈，不直者即沈也。有甘蔗、諸蔗、安石榴及橘，多檳榔，鳥獸如中國。人性善，不便戰，常爲林邑所侵擊，不得與交州通，故其使罕至。

[（梁）蕭子顯《南齊書》卷五八·
列傳三九·東南夷·扶南國傳]

梁書·海南諸國傳

海南諸國，大抵在交州南及西南大海洲上，相去近者三五千里，遠者二三萬里，其西與西域諸國接。漢元鼎中，遣伏波將軍路博德開百越，置日南郡。其徼外諸國，自武帝以來皆朝貢，後漢桓帝世，大秦、天竺皆由此道遣使貢獻。及吳孫權時，遣宣化從事朱應、中郎康泰通焉。其所經及傳聞，則有百數十國，因立記傳。晉代通中國者蓋少，故不載史官。及宋、齊，至者有十餘國，始爲之傳。自梁革運，其奉正朔，脩貢職，航海歲至，逾於前代矣。今採其風俗粗著者，綴爲〈海南傳〉云。

[（唐）姚思廉等《梁書》卷五十四·
列傳四八·諸夷·海南諸國]

扶南國，在日南郡之南，海西大灣中，去日南可七千里，在林邑西南三千餘里。城去海五百里。有大江廣十里，西北流，東入於海。其國輪廣三千餘里，土地溇下而平博，氣候風俗大較與林邑同。出金、銀、銅、錫、沉香、象牙、孔翠、五色鸚鵡。

其南界三千里有頓遜國，在海崎上，地方千里，城去海十里。有五王，並羈屬扶南。頓遜之

東界通交州，其西界接天竺、安息徼外諸國，往還交市。所以然者，頓遜迴入海中千餘里，漲海無涯岸，船舶未曾得逕過也。其市，東西交會，日有萬餘人。珍物寶貨，無所不有。又有酒樹，似安石榴，採其花汁停甕中，數日成酒。

頓遜之外，大海洲中，又有毗騫國，去扶南八千里。傳其王身長丈二，頭長三尺，自古來不死，莫知其年。王神聖，國中人善惡及將來事，王皆知之，是以無敢欺者，南方號曰長頸王。國俗有室屋衣服，噉粳米。其人言語，小異扶南。有山出金，金露生石上，無所限也。國法刑罪人，並於王前噉其肉。國內不受估客，有往者亦殺而噉之，是以商旅不敢至。王常樓居，不血食，不事鬼神，其子孫生死如常人，唯王不死。扶南王數遣使與書相報答，常遺扶南王純金五十人，食器形如圓盤，又如瓦堰，名為多羅，受五升，又如碗者，受一升。王亦能作天竺書，書可三千言，說其宿命所由，與佛經相似，並論善事。

又傳扶南東界即大漲海，海中有大洲，洲上有諸薄國，國東有馬五洲，復東行漲海千餘里，至自然大[火]洲。其上有樹生火中，洲左近人剝取其皮，紡績作布，極得數尺，以為手巾，與焦麻無異，而色微青黑；若小垢滲，則投火中，復更精潔，或作燈炷，用之不知盡。

扶南國俗本裸體，文身被髮，不製衣裳。以女人為王，號曰柳葉，年少壯健，有似男子。其南有徼國，有事鬼神者字混填，夢神賜之弓，乘賈人舶入海，混填晨起即詣廟，於神樹下得弓，便依夢乘船入海，遂入扶南外邑。柳葉人眾見舶至，欲取之。混填即張弓射其舶，穿度一面，矢及侍者。柳葉大懼，舉眾降混填。混填乃教柳葉穿布貫頭，形不復露，遂治其國，納柳葉為妻，生子分王七邑。其後王混盤況以詐力間諸邑，令相疑阻，因舉兵攻併之，乃遣子孫中分治諸邑，號曰小王。

盤況年九十餘乃死，立中子盤盤，以國事委其大將范蔓。盤盤立三年死，國人共舉蔓為王。蔓勇健有權略，復以兵威攻伐旁國，咸服屬之，自號扶南大王。乃治作大船，窮漲海，攻屈都昆、九稚、典遜等十餘國，開地五六千里。次當伐金鄰國，蔓遇疾，遣太子金生代行。蔓姊子旃，時為二千人將，因篡蔓自立，遣人詐金生而殺之。蔓死時，有乳下兒名長，在民間，至年二十，乃結國中壯士襲殺旃，旃大將范尋又殺長而自立。更繕治國內，起觀閣遊戲之，朝旦中晡三四見客。民人以焦蔗龜鳥為禮。國法無牢獄。有罪者，先齋戒三日，乃燒斧極赤，令訟者捧行七步。又以金鑲、鷄卵投沸湯中，令採取之，若無實者，手即焦爛，有理者則不。又於城溝中養鰐



魚，門外圈猛獸，有罪者，輒以喂猛獸及鰐魚，魚獸不食爲無罪，三日乃放之。鰐大者長二丈餘，狀如鼉，有四足，喙長六七尺，兩邊有齒，利如刀劍，常食魚，遇得麋鹿及人亦噉之，蒼梧以南及外國皆有之。

吳時遣中郎康泰、宣化從事朱應使於尋國，國人猶裸，唯婦人著貫頭。泰、應謂曰：“國中實佳，但人褻露可怪耳。”尋始令國內男子著橫幅。橫幅，今干漫也。大家乃截錦爲之，貧者乃用布。晉武帝太康中，尋始遣使貢獻。……

[（唐）姚思廉等《梁書》卷五四·列傳四八·諸夷·海南諸國·扶南國]

天竺……吳時扶南王范旃遣親人蘇物使其國，從扶南發投拘利口，循海大灣中正西北入，歷灣邊數國，可一年餘到天竺江口，逆水行，七千里乃至焉。天竺王驚曰：“海濱極遠，猶有此人！”即呼令觀視國內，仍差陳、宋等二人以月支馬四匹報旃，遣物等還，積四年方至。其時，吳遣中郎康泰使扶南，及見陳、宋等，具問天竺風俗。

[（唐）姚思廉等《梁書》卷五四·列傳四八·諸夷·海南諸國·中天竺國]

附錄

2 引書版本

三國志

（西晉）陳壽 中華書局1959年版

搜神記

（西晉）干寶 中華書局1959年汪紹楹校注本

吳都賦注

（西晉）劉逵 《文選》嘉靖刻本

水經注

（北魏）酈道元 上海人民出版社1984年王國維校本

南齊書

（梁）蕭子顯 中華書局1972年版

編珠

（隋）杜公瞻 手抄本

北堂書鈔

（隋）虞世南 光緒十四年孔廣陶校刊本

藝文類聚

（唐）歐陽詢 中華書局1965年版

梁書

（唐）姚思廉等 中華書局1973年版